



中州壬集第九

白先生贊一首

王內翰樞一首



睡軒先生趙晦一首

浚水王先生世賞四首

南湖靖先生天民一首

東臯桑先生之維一首

步元舉一首

馮文叔一首

張庭玉一首

宗道一首

鮮于溥三首

史士舉二首

王敏夫二首

王利賓一首

孫益一首

郝先生天挺一首

孫邦傑一首

張瓌一首

徐好問一首

呂大鵬一首

高永一首

曹用之一首

趙達夫二首

邢安國二首

張温一首

馬舜卿一首

劉曹王豫七首

杜丞相充一首

虞令公仲文一首

張丞相孝純一首

張左相汝霖一首

劉右相長言一首

右相文獻公耶律履一首

張平章萬公一首

董右丞師中一首

孫太師鐸一首

梁參政瑄一首

賈左丞益謙一首

丞相壽國高公汝勵一首

胥莘公鼎一首

張左丞行中一首

楊戶部慥二首

鄭內翰子聃一首

孟內翰宗獻六首

趙內翰摠一首

趙文學承元一首

張太保行簡三首

張內翰楫四首

閻治中長言八首

李治中著一首

擬栩先生王中立六首

王先生予可七首

照了居士王或三首

無事道人董文甫七首

薛繼先四首

白先生賁

顯賁汴人自號決壽老自上世以來至其孫洲俱以經學

客有求觀予孝經傳者感而賦詩

古人文瑩理後人但工文文工理愈暗紙扎何紛紛君
看六藝學天葩吐奇芬詩書分躰製禮樂造乾坤千岐
更萬轍要以一理存如何臻至理當從踐履論跋涉經
險阻鑽研閱寒溫孝弟作選鋒道德嚴中軍仰觀及俯
察萬象入見聞不勞施斧鑿筆下生煙雲高以君唐虞
下以覺斯民君如不我鄙時來對爐熏

王內翰樞

樞字子慎良鄉人遼日登科仕國朝直史館

三河道中

十載歸來對故山山光依舊白雲閑不須更讀元通偈
始信人間是夢間

睡軒先生趙晦

晦字光道管城人宋末代州法曹秀容主簿汴京破後
不復仕自號睡軒居士子洵子都大定二十年進士真
定路總管判官孫綱三赴廷試以蔭補官終于永壽令
曾孫居禮之讓今在燕中

暮春

壓枝梅子半青黃葉底殘紅雨褪香翠鈿舞風榆落英
綠鍼浮水稻抽秧酒濃猶覺春醒困睡美方便午夢長
苦被啼鶯訴花老揮毫聊作送春忙

浚水王先生世賞

世賞字考功汴人與尹無忌王逸賓趙文孺相周旋明

窮當化亨
昌中保舉才能德行賜出身釋褐鞏州教授終于鹿邑
簿有浚水老人集傳于世

立春後十日登樓

今日登樓眼風煙倍覺新
溪梅初破萼屋雪半融銀
鴈外天逾碧鷗邊水自春
兒曹應見笑吟望獨傷神

春雪

只謂春天暖寧知雪霰飛
龍蛇且深蟄花柳不勝威
糝糝凌風細紛紛帶雨稀
誰當問窮昊生殺果何機

探梅

候得南枝破玉腮
心顏今日為君開
細看苔徑無行跡
先賞應輸我獨來

稱善齋

官途馳逐只堪羞
何意須封萬戶侯
平日少游真可念
絕勝辛苦駐壺頭

南湖靖先生天民

天民字達卿滏陽人其父國初官原武因而家焉少日
嘗兩魁鄉試自望者不碌碌所與交如龐中卿楊茂才
劉之昂王逸賓皆一時名士晚年買田南湖葺亭園植
竹樹以詩酒為事自號南湖老人年七十九卒子文煒
德昭從孫顥子昂

西子放瓢圖

鬢髮蕭颯兮羅袂千古香
溪水自流吳越兵爭竟何得

風流翰與五湖舟

東臯桑先生之維

之維字之才恩州人蔡丞相伯堅之子婿也以樂府著稱有東臯集傳于世

白髮

白髮近年見十中三兩莖半因愁憤出多為病添成梳裏有時落緝餘還又生老知無可避何處是功名

步元舉

元舉閩中人

下第過榆次

栖遲零落未歸人已坐無成更坐貧意氣敢論題桂客

晨昏多負倚門親囊空漸覺錢餘買衣敝翻饒虱滿身
遙望秦關獨惆悵一天風雨落花春

馮文叔

文叔遼東人

客舍

秃襟袖褐破書囊十五年來客異鄉生事穿中搖虎尾
窮途天上轉羊腸三朝不遇馮唐老半夜悲歌寧戚狂
獨倚牛車望遠海西風塵土鬢蒼蒼

張庭玉

庭玉字子榮易縣人能日賦百篇有集行于世

即事

烏爲鏡樹山黍熟胡蝶穿花木槿開赤脚城中借書去
蒼頭原上負薪來

宗道

道字雲叟山陰人以足疾不仕有詩云家藏千卷富身
得一生閑茅屋經年補柴門盡日閑其自處可見

寶崑僧舍

寂寂鐘魚相滿軒午風輕颺煮茶煙西堂竟日無人到
只許山人借榻眠

鮮于溥

溥字孝仁宋文臣子駿之後高祖淳淳之子孝標標之
子壽吉壽吉之子坦皆擢進士第而仕亦遠孝仁坦之

子以門資仕終于櫟陽今濟源盤谷天壤佳處坦父子
居其間飲酒賦詩翛然塵垢之外至今人以高士目之
弟彥魯子忠厚今居鄉里

魯村道中

小橋沙路已堪圖更著衰翁跨蹇驢暮靄似催寒日短
秋容仍帶遠林疎鷗盤平野黃榆落兔走橫岡白草枯
漸喜閑身遠朝市一年強半在村墟

春日做舊詩體

年老逢春莫等閑逢春能得幾回看插花儘要花枝滿
把酒休辭酒琖乾好向酒邊留舞袖不妨花外駐吟鞍
聞身健在須行樂燕語鶯啼春又殘

早發

燈前夢斷家千里馬上詩成月一痕晨粥未烹官路遠
隔林煙火是漁村

史士舉

士舉字仲升榮澤人漢功臣弘肇之後高祖所賜鐵券
故在其大父官濟源樂其山水因家焉父神山令教石
瑀榜進士仲升以蔭補官歷銅鞮三川兩縣令初任京
兆錄事以歲旱擅開倉賑貧身往太一湫禱雨尋獲嘉
樹用是得名為人雅重知義理衰衣緩帶消搖山水間
宛然一老書生也貞祐之亂避于太行保聚失守老幼
皆出降仲升義不受辱投絕澗而死年七十九孫庭玉

字德秀今居山陽

超化

石根寒溜迸珠璣尋丈驚看雪浪飛我是玉川煙水客
整來盤礴亦忘歸

晉祠

小橋流水竹蕭森竹裏人家一徑深只欠東風小籬落
梅花踈淡月籠陰

王敏夫

敏夫五臺人作詩工於賦物甚為趙宜之所稱鴈門前
葦中有許蛻子遷以武皇廟詩著名又酒渴後四句云
眼底恨無雲夢澤曾中疑有沃焦山南窻花影三竿日

指點銀瓶照病顏有集傳河東徃徃稱此倪氏望字具
瞻屏山所謂倪侯頭如筆其鋒不可當者有種松詩云
種松莫種柳種柳莫種松堅脆非所計雅俗寧與同可
是種松無隙地却教憔悴柳陰中張韶九成寄朔州苟
輔臣云陳雷膠漆輕餘子楚漢風雲屬少年李忠直卿
賦雪云不將柳絮春風比好作梨花月夜者至于蘇吉
莘老李鵬翼冲霄與具瞻之子仲儀詩文多可傳喪亂
之後惜不能記憶之矣

同東崑元先生論詩

林逋仙去幾來年驚見梅花第二篇千歲冰霜松骨瘦
九秋風露鶴聲圓騰輝定出連城上得趣知從太古前

邂逅茅齋話終夕只疑人世改桑田

李氏友雲樓

霧幕煙迷十二欄壺觴招我一躋攀黃簾卷起湘川竹
分得西州數點山

王利賓

利賓字茂實襄城人朴直純素作詩有古意似其為人
然亦未嘗以示人也家與衛昌叔隣居而不相徃來計
平生所交唯不肖而已予一日過襄城知茂實病就卧
內候之乃見壁間所黏五言古詩十數首竄改重疊徃
徃可傳然後知茂實所以交予者特以詩故耳渠既不
言予亦無從知之惜登時不謄寫今忘之矣

題扇頭

輕紗畫竹雀柄短不盈握暑氣正憑陵清風一何邈

孫益

益字德裕秀容人嘗從先大夫學詩

送張安中還雲中名保極雲朔名士

相送還相送臨分手重分驂驢欣得路鴻鴈惜離羣木
落黃華露城似紫塞雲中秋月正好千里謾思君

郝先生天挺

天挺字晉卿陵川人家世儒素伯父子颺有詩名號東
軒老人先生少日有賦聲早衰多疾感於名場遂不復
就舉貞祐之兵避于河南往來淇衛間爲人有畫岸耿

耿自信寧落薄而死終不一傍富兒之門年五十七卒
於舞陽臨終浩歌自得不以死生爲意其平生自處爲
可見矣好問十四五先人令陵川時從先生學舉業先
生教之曰今人賦學以速售爲功六經百氏分磔綴緝
外或篇題句讀之不知幸而得之不免爲庸人况一敗
塗地者乎又曰讀書不爲藝文選官不爲利養唯通人
能之又曰今世仕官多用負墨敗官皆苦于飢凍不能
自堅者耳男子生世不耐飢寒則雖小事不能成子試
以吾言求之先生工於詩時命好問屬和或言令之子
欲就科舉詩非所急將無徒費日力耶先生曰君自不
知所以教之作詩正欲渠不爲舉子耳子思溫字和之

孫經字伯常今居順天

送門生赴省闈

青出於藍青愈青少年場屋便馳聲未饒徐淑早求舉
却笑陸機得得名嗟我再衰空眊矚喜君初筮已崢嶸
此行占取鰲頭穩平地煙霄屬後生

孫邦傑

邦傑字伯英雄州容城人曾祖堅國初有功官至隴州
刺史伯英以日住太學有時名所與游皆名士俱定初
知世將亂棄家爲黃冠師

燒笋

煨菴舊聞山谷語勸耕還憶大蘇詩傳將火候無多訣

留得天真又一奇未放錦綉開束縛已看玉版證茶毗
白麻初拜驚燒尾見此應慚富貴癡

張璣

璣字君玉大名朝城人嗜作詩年已老而刻苦殊未減
爲人謹愿有禮見稱諸公間卒年六十八子鏞鎮今居
鄉里

送侯道士

十年走南北黃塵汙人衣翩翩夜啼鳥一枝無可依問
君何所如鳧舄東南飛恨我不得往失脚穿與機從君
知不能一笑人間非何水無蒲魚何山無蕨薇終當攜
衣去徃叩雲山扉

徐好問

好問字裕之永寧人

龍門

疏鑿而來道路通行人萬古翠微中南山山寺題詩滿一字何曾到禹功

呂大鵬

大鵬字鵬舉密縣人自言宋名相申公之裔宣宗頻歲南伐鵬舉作詩欲以撼主兵者云縫掖無由挂鐵衣劍花生澁馬空肥燈前草就平南策一夜江神泣涕歸其以氣岸自許皆此類也

夏日北渡後作

旋移石枕拂藤床細洒槐陰趁晚涼大地嗷嗷困爐鼎
老天不肯下殘陽

高永

永字信卿出于盤陽大族父元字善長教信卿作舉子讀書略通即棄之去爲人不顧細謹有幽并豪俠之風賓客入門則盡家所有者爲具不爲明日計人以此愛之貞祐初避兵太原與李長源居于廣平寺有盜穴墻而入長源性怯怯聞騷宰聲噤不敢語盜盡挈信卿所
有而去長源徐曰綠林之子至矣於是信卿生理大狼狽南渡居嵩州出入屏山之門其學遂進初名慶字舜卿文名揆屏山改焉真定王之奇士衡以雜學屏山目

爲怪魁王從之內翰爲賦善哭詩奉聖馬餌升公敢爲
大言著書十萬言號北新子大略以談兵爲主且曰古
人兵法非不盡但未有北新子五十里火兩耳信卿皆
與之游故其詩豪宕譎怪不爲法度所窘有冰柱雪車
風調觀咀龍篇及大雨後見寄可樂見矣正人壬辰病
沒於京師年四十六

跋賈天升所藏段志寧山水

蒼壁雲嵐湧長松風雨寒湍流劈山出玉虹飲溪灣曾
中無雲夢筆底無江山想見破墨初布袖蛟龍蟠壯觀
駭心魄萬象本自閑寒齋靜相對遠意空追攀

曹用之

用之歸德人幼有賦聲屢中甲乙詩亦有功嘗戲作鬼
仙語云瀏瀏竹間雨熒熒牕下燈相逢不相顧含淚過
巴陵詩有本事中山揚正卿能道所以然真人作鬼語
也

憶舊

花鳥巡簷喚曉晴喚來和氣滿春城春風二十年前客
煮酒青梅也後生

趙達夫

達夫太原人性嗜讀書而不事科舉南渡後居維氏山
中安貧守分故終世窮悴壬辰之兵遇害

紅梅

西湖句好已成塵蠟點都能幾許春乞與瓊兒薄梳洗
才情留待月中人

柳

楊柳攬春不耐秋十分憔悴儘風流水邊沙際風煙冷
收拾殘陽合暮愁

邢安國

安國字仲祥沁州武鄉人少日有賦聲四十歲後即不
應科舉以詩酒自娛避亂客泌陽十餘年後北歸備極
艱苦其見於詩者如此往時李長源傳仲祥柳花一詩
渠甚愛之今以丹崖集校之與傳者不同當是長源曾
與商略之耶

楊花

細點輕團轉復飄隋家堤岸霸陵橋非綿非絮寒無用
如雪如霜暖不消狂惹客衣知有恨巧尋裊故相擦
陂塘回首浮萍滿依舊春風擺翠條

過唐州西李口

白沙翠竹溪上村漁家賣魚喚行人西風吹皺一溪水
水光日影金鱗鱗

張温

温字元佐上黨人祖仲容字才翁宋末登科仕至屯田
員外郎以好士名天下致仕後有詩云病身衰退謝明
朝北洞閑眠晝寂寥十畝晚禾煙冉冉一林脩竹雨瀟瀟

滿黑花遮眼款不落白雪撲頭春未消世事悠悠吾老
矣一壺濁酒且逍遙至今爲鄉里所傳元佐泰和六年
李演榜乙科登第詩樂府俱有名于時

感懷一首

彌月不出門出門冰漲東風昏老樹擺撼轟雷奔鬼物
叫嘯山前村僑居客子驚心魂歸來遶屋桑蘭孫蘭孫
落索靈苗鬣主人醉倒老瓦盆衣袖半帶淋漓痕芸芸
蕭艾同歸根天生天殺何怨息糟床與翁共清渾絕勝
被髮叫帝閭

馬舜卿

舜卿名育龍以字行宛平人先世遼大族有知興中府

者故又號興中馬氏祖大中國初登科節度全錦兩州
父成誼字宜之張揖榜登科京兆路統軍司判官舜卿
在太學有賦聲宣宗初人有告宗室從坦殺人從坦字
履道一時賢將帥處猜嫌之地人以其必死而不敢言
其寃舜卿以太學生上書大略謂從坦有將帥材方今
人物無有出其右者臣一介書生無用於世願代從坦
死留爲天子將兵書奏詔問汝與從坦交分厚耶舜卿
對臣知有從坦而從坦未嘗識臣從坦寃人不敢言臣
以死保之宣宗感悟赦從坦授舜卿東平錄事委行臺
試驗宰相侯莘公與之語不契留數月罷歸將渡河與
排岸官紛競篋中搜得軍馬糧料名數及利害事目疑

其姦人之偵伺者繫歸德獄根勘適從坦至立命出之
正大四年冬薄游鳳翔德順州將愛申以書招舜卿舜
卿欲往鳳翔總管以敵兵勢甚張吾城可恃德順不可
守勸勿往舜卿曰愛申平生未嘗識我一見為知己我
知德順不可守我往必死然以知己故不得不死也乃
舉行橐付族父明之為死別冒險而去既至不數日受
圍城中義兵七八千而已州將假舜卿鳳翔總管判官
守禦一以委之凡受攻百日食盡乃陷軍中募生致之
不知所終時年五十三詔贈某官配食褒中廟舜卿年
少時過襄垣題詩酒家壁舜氣縱橫時輩少有及者如
云玉鞭再過長安道人面依前似花好殷勤勸我梨花

春要看尊前玉山倒他語類此

會州道中

山腰薄雪眩朝暎未放陽和入燒痕一片長安世情月
梨花院落幾黃昏

諸相

劉曹王豫

豫字彥由阜城人仕宋知濟南府事汴京下立張邦昌
為大楚皇帝宋滅楚更立彥由國號齊建元阜昌八年
廢為蜀王遷黃龍府改封曹有集十卷行于世二子麟
猗孫通海陵朝參知政事四世孫瑛今在太原

雜詩六首

竹塢人家瀕小溪數枝紅杏出疎籬門前山色帶煙重
幽鳥一聲春日遲

風荷柄柄弄清香輕薄沙禽落又翔紅日轉西漁艇散
一川山影暮天涼

古渡停驂日向沉淒涼歸思梗清吟碧山幾點塞天闊
紅葉一林秋意深

倚崑蕭寺據危崖丈室軒窓面水開雪霽暮寒山月上
數竿脩竹一枝梅

晝色晴明着色圖山光凝翠接平湖煙嵐自古人難畫
遠即深深近却無

寒林煙重暝棲鴉遠寺疎鐘送落霞無限嶺雲遮不斷

數聲和月到山家

客館

雪消北嶺安排暖寒入東風阻節春絕塞亂山圍古驛
他時說着也愁人

杜丞相充

充字公羨相州人仕宋知滄州歸國拜尚書右丞相領
中山行臺以壽終

塵

汨汨勞生爲爾忙只除不到白雲鄉步回洛浦生羅襪
歌斷秦樓軟杏梁閑撲衣襟迷遠望靜穿窓隙鎖斜陽
帝城別有風流在輦路春風十里香

虞令公仲文

仲文字質夫世南之裔武州寧遠人仕爲遼相歸朝授樞密使平章政事封秦國公四歲作詩賦煎餅有魚目蟬聲之句人以神童目之

雪花四歲作

瓊英與玉蕊片片落前池問着花來處東君也不知

張承相孝純

孝純字永錫滕陽人宣和末知太原國兵圍守踰年人相食幾盡乃下朝廷怜其忠換相職後以相齊致仕汴京建行臺起爲左承相踰年得請歸鄉里二兄尚安健鄉人爲作三老圖薨謚安簡子公藥字元石昌武軍節

度副使致仕孫觀字彥國世爲文章家曾孫厚之字茂弘承安二年進士

中運使寄酒清明日到以詩謝之

芳樽到日恰清明似與嘉辰默計程擬助林園延勝賞肯容桃李落繁英老來官爵渾無味閑裏杯盤却有情見說使車臨岱麓儻能相過共飛觥

張左相汝霖

汝霖字仲澤遼陽人家世貴顯父浩字浩然以門資仕揚歷中外遂升端揆進拜太師封南陽郡王五子仲澤平章政事莘國公汝爲字仲宣河北東路轉運使汝翼仕不達皆進士也汝方字仲賢自號丹華老人汝猷字

仲謀俱至宣徽使父子兄弟各有詩傳于世王子端內
翰太師之外孫其淵源有自云

春溪一首

黯黯春愁底處消小挑無語半含嬌東風不管前溪水
暖綠溶溶拍畫橋

劉右相長言

長言字宣叔東平人宋相莘老之孫而學易先生斯立
之猶子也父蹟年三十五終於儀真令工詩能文有南
榮集傳東州令獨予家有之宣叔正隆宰相詩文能世
其家今不復見矣

通叔以詩送古鏡爲長言生日之壽次韻謝之

綵衣綠隱非臞仙猶有向來文字緣都城一別兩歲晚
寄聲勞苦常相先人間始生俗禮重而我永感方頽然
遠憑詩句致奇物欲挽暮景迴虞淵規摹九寸函大方
古製不作菱花妍開奩拂拭愧陋質但喜虹氣浮晴天
夫君久要心不遷期與鐵杖論清堅保身賴此孤月圓
明年上印歸行田

右相文獻公耶律履

履字履道東丹王之七世孫學通易太玄至於陰陽歷
數無不精究嘗以鄉賦一試有司以露索爲耻遂不就
舉蔭補國史掾興陵朝累遷薊州刺史入翰林爲修撰
歷直學士待制禮部尚書特賜孟宗獻榜進士弟俄預

淄王定冊功拜叅知政事明昌元年進右丞薨年六十
一興陵嘗問宋名臣孰為優履道以蘇端明軾對上曰
吾聞軾與王誥交甚款至作歌曲戲及姬侍非禮之甚
尚何足道耶履道進曰小說傳聞未必可信就使有之
戲笑之間亦何得深責世徒知軾之詩文人不可及臣
觀其論天下事實經濟之良才求之古人陸贄而下未
見其比陛下無信小說傳聞而忽賢臣之言明日錄軾
奏議上之詔國子監刊行自號忘言居士有集傳于世
三子辨才武廟署令善才工部尚書楚才中書令四孫
鈞鉉鏞鑄

史院從事日感懷

不學知章乞鑑湖不隨老阮醉黃壚試從麟閣諸賢問
肯肩蘭臺小史無一戰得侯輸妾尉長身奉粟媿侏儒
禁城鍾定燈花落坐拊塵編惜壯圖

張平章萬公

萬公字良輔東阿人正隆二年進士仕長山令有惠政
人為立祠入為右司員外郎太師淄王愛之許以宰相
器明昌初累遷御史中丞以言事忤旨除彰國軍節度
使召為大興尹拜叅知政事以母老丐歸養出判東平
河中濟南丁內艱起復擢平章政事封壽國公為相知
大體有敦厖耆艾之目既致政而眷顧未衰復起判濟
南安撫山東便宜行事未幾得請薨於家謚文貞繪像

衍慶宮配享章宗廟廷

戊戌二月中旬登稷山清榭

問囚推崇朝還暮危坐不知春淺深今日簷間看風色
一株紅杏暗驚心

董右丞師中

師中字紹祖邯鄲人後徙洛州皇統九年進士承安中
入政府直道自立而以通材濟之泰和初元妃李氏方
寵幸兄喜兒為宣徽使有楊國忠之權一日德州教授
田庭方上書言事云大臣持祿近臣怙寵此言路之所
以塞也道陵顧謂紹祖言大臣持祿當謂公等近臣怙
寵者為誰時喜兒侍立殿上紹祖倒笏指之曰莫非謂

李喜兒之屬否上頷之紹祖嘗言作宰相不難但一心
正兩眼明足矣少日以談諧得名又在相位亦未嘗廢
談笑然不害其為國朝名相也俄致政賜第京師後三
年薨有燕賜邊部詩傳於世紹祖師王內翰彥潛而與
之同榜登科彥潛沒後待其子恩禮殷重不減骨肉論
者謂孫鐸振之事其兄明之張毅伯英愛其弟伯玉舉
世無與為比至於紹祖之待其師之子則古所未有也
有漳川集傳于家

自臨洮還

臨潭仍是漢家城漢家城在臨積石相望十驛程西略
河源東竝海此身何地不經行紹祖又作塵埃風雨嘆

生勞

孫太師鐸

鐸字振之恩州人大定十三年進士明昌中擢戶部尚書時已有相望及考滿以戶曹繁重且未有可代者特旨進一官再任而同列二人俱以入相矣振之賀席中戲舉青州老栢院布衣張在詩云南隣北里牡丹開公子王孫去不回惟有廷前老栢樹春風來似不曾來爲御史所劾降授同知河南府事有以詩送之者云想到洛陽春正好南隣北里牡丹開聞者皆大笑振之後入政府遷尚書右丞薨贈太子太師作詩甚多其賦玉簪有披拂秋風如有待裴回涼月更多情之句甚爲詩家

所稱

癸亥清明日

脩然一室暗塵凝兀兀端如打坐僧習氣未除私自笑短檠還對讀書燈

梁參政瑾

瑾字國寶別字瑩中范陽人大定十六年進士歷州縣稍遷警巡使治尚嚴肅權貴斂迹朝廷知其才累試繁劇由中都路轉運使拜戶部尚書俄參知政事資方正敢言大事北兵動立和議人有笑其懦者卒如其言未幾薨于位虎賁咤曰梁瑾在族矣其爲人可知

留題長平驛

秦趙均為失霸圖起何殘忍括何愚殺降未見無禍者
累將其能有種乎日暮悲風噎丹水夜深寒月照頭顱
也山名快心千載杜郵劍人所誅耶鬼所誅

賈左丞益謙

益謙字亨甫本名守謙避哀宗諱改焉宣宗朝叅知政
事出知濟南移鎮河中南渡後召拜左丞尋致仕居鄭
州哀宗即位史官乞因宣廟實錄遂及衛紹王初虎賊
既弒逆乃立宣宗宣宗之人至謂衛王失道天命絕之
虎實無罪且於主上有推戴之功獨張信甫上章言虎
賊大逆不道當用宋文帝誅傅亮徐羨之故事章奏不
報爾後舉朝以大安崇慶之事為諱及是謂亨甫大安

中嘗拜御史中丞宜知衛王事乃差編脩官一人就訪
之亨甫知其旨謂來者言知衛王莫如我然我聞海陵
被弒而世宗皇帝立大定三十年禁近能暴海陵蟄惡
者得美仕史官修實錄誣其淫毒狼鷲遺臭無窮自今
觀之百可一信耶衛王勤儉慎惜名器較其行事中材
不能及者多矣吾知此而已設欲飾吾言以實其罪吾
亦何惜餘年朝議偉之正大三年年八十薨子賢卿願
卿翔卿皆以門資仕今一孫仲明在東平

贈荅文院從事

見說才名自妙年多慙政府舊妨賢物華天寶無今古
鳳閣鸞臺孰後先鄭圃道尊何敢望濟南書在子當傳

莫言老眼昏花滿及見風鵬上九天

丞相壽國高公汝礪

汝礪字崑甫應州金城人大定中進士揚歷中外居戶曹三司爲最久相宣宗十年小心畏慎夙夜匪懈篤于古人造膝詭辭之義謀謨周密人莫得而聞元光末宣宗上仙公亦薨于位君臣之契義均同體者於斯見之平生嗜讀書南渡之後機務倥傯未嘗一日廢書不觀臨終留詩有寄謝東門千樹柳安排青眼送行人之句時年七十一謚配享宣宗廟庭至今士論謂公才量渾厚足爲守成之良相恨所遭不時耳

兩後

時兩兩三日田家家萬金有年天子慶憂國老臣心

胥莘公鼎

鼎字和之代州繁峙人父持國大定中爲太子司藏有功母后家章宗即位擢拜尚書右丞和之大定二十八年進士至寧初都城受兵由戶部尚書叅知政事宣宗即位除泰定軍節度使不赴改判大興貞祐二年拜尚書右丞車駕南渡出爲汾陽軍節度使移知平陽權河東南路宣撫使四年授樞密副使權右丞兼職如故五年正月朝京師進平章政事封莘國公行臺關中未幾兼左副元帥明年以溫國公致政進封英行臺衛州以病薨於位雷希顏爲作神道碑云黃霸爲良吏稱首及

爲丞相與張敞論列功名大減王允當漢祀之衰計誅
董卓近古社稷臣然不赦涼州人旋致催汜之禍蕭俛
之清介崔植之論議皆足爲唐名臣而俛議銷兵植餓
朱克融輩不畀一官遂再亂河朔彼或量不足或才略
有所窮權不足以濟事知不足以知時故也以姚崇之
賢惟其不知道未免爲採時之相其他可知也國家有
通明相曰英國胥公尚蕙數公之長子謂希顏此論似
涉過差至于爲國朝名相以度量雄天下則在公爲無
媿矣在長安日乞致仕表云興造功業方聖主有爲之
時表裏山河豈愚臣養病之地送弟有之云世事正須
高着眼官途休厭少佞頭他文類此弟恒常之子嗣祖

今在燕中

送弟恒作州

男子四方志人生五馬榮君恩何以報民政不宜輕御
物當存恕存心要盡誠勿矜新號令姑守舊章程斂暴
單貧困囚淹狡僞萌慈柔難禁暴苛急必傷生東郡吾
將老西陲敵未平一生能幾別四事果難并方此對床
樂愴然分袂驚荒詩何足記聊寫弟兄情

張左丞行中

行中字信甫莒州日照人祖莘鎮西軍節度副使父暉
御史大夫以武安軍節度致仕兄行簡易無體榜第一
人信甫大定二十八年進士衛紹王朝虎賊已除名爲

民賂遺權貴得復用信甫言其必反及弒逆自為太師
尚書令澤王信甫時為禮部尚書人謂必為所殺甚危
之一日虎下禮部鑄監國寶信甫持不可虎雖怒然亦
竟不能殺也宣宗即位授叅知政事丞相高琪專權用
事聲勢熾熾人莫敢仰視議論之際唯信甫與之抗朝
廷稱馮所居拙軒有為作銘者其引云發凶豎未形之
誅則先識者以為明犯強臣不測之威則疾惡者以為
剛蓋實錄云元光末出為靜難軍節度使哀宗即位首
命召之遷尚書左丞後二年致政卒於崧山之崇福宮
信甫家世儒素雖位宰相而奉養如寒士日書經史五
百字為課寒暑不廢者四五十年故於書無所不讀詩

殊有古意也

右丞文獻公所畫張果像

古來人物畫為難驚見仙公樹石間莫把丹青名右相
太平勲業在人寰

楊戶部慥

慥字叔玉代州五臺人承安五年進士歷州縣入為尚
書省令史拜監察御史侍御史京西大農司丞京南司
農卿戶部侍郎權尚書自入戶曹即有相望資雅重事
無巨細處之皆有法至於知朝廷大體則又非他人所
能及也京城受兵權叅知政事明年卒於河平叔玉文
工於詩而人不以能文稱特未見其文耳

過司竹監有懷王監正之

不見崧丘跨鶴仙才名留得萬人傳春郊清酒傷今日
夜雨論文記昔年宰樹謾懸公子劍高山已絕伯牙絃
故居脩竹青青在寂寞終南落照邊

乾陵

牝雞一啄血波流天下何緣不姓周今日阿婆心力盡
乾陵禿似老僧頭

狀元

鄭內翰子聃

子聃字景純大定人少日有賦聲時輩莫與為敵天德
三年第三人登科士論仍以爲屈而海陵不之許也正
隆二年詔景純再試擇能賦者八人先以題付之以因

景純且將視其中與否罪賞之

御題 賜勇智正萬邦 漢高祖諱

不避之可乎及開卷景純果第一人

揚伯仁張汝霖中

選劉幾綦戩李師顏輩皆被黜海陵終不以景純爲工
與被黜者兩罷之趙獻之賀啓云丹桂一枝不失舊物
青錢萬選無媿古人其爲名流所稱道如此累官吏部
侍郎改侍講學士卒其賦餘醪有玉斧無人解修月珠
裙有意欲留仙之句甚爲詩家所稱

即事

一錢不直程衛尉五斗解醒劉伯倫讀罷離騷解衣卧
門前花柳自爭春

孟內翰宗獻

宗獻字友之開封人大定三年鄉府省御四試皆第一
供奉翰林曹王府文學兼記室叅軍以疾尋醫久之授
同知單州軍州事丁母憂哀毀致卒劉無黨題其詩卷
後云簪紱忘情累山林閱歲陰選官堂印手說法老婆
心絃與世路嗟前却人生變古今公乎真不死名姓
斗之南相人孔嗣訓挽云二十年間事才名一夢新衰
羸驚喪母哀毀竟亡身魂返愁楓夜情留淚草春黃公
酒壚在此去只悲辛沐人高公振特夫云見說平生夢
前途盡目前敵味第時夢中預見乘除雖有數凶禍
竟何緣禮樂三千字才名二十年仁人遽如許無路問
蒼天又云誰謂詩成識清冰果自焚友之雪燭府固知

清才也自焚人嗟埋玉樹天為落文星
未幾下世友之數詩雖不盡工姑并記之有以見先生
所居虛齋軒前於出處之際死生之變造物者皆使之前知其以天下
重名界之者為不偶然云

龔平甫森玉軒

古人借宅亦種竹大是曠竒心未足高齋聞有萬琅玕
坐對懷山飲秋綠官閑勝日無一事尊酒不空仍有肉
他時剝啄叩君門高枕矮床容我宿

舊畜一琴弃置者久之李君仲通為張絃料

理仍鼓數曲以詩贈之

我家琴箏久憂樂同塵埃滿面鬢髮蓬微絃不具挂墻壁

似慙無以娛衰翁夫君一見為披拂坐使寒谷回春融
中含太古意味足雜以新態來無窮繁聲流水不可喻
直與造化相冥通形神久已坐灰槁一旦決別驅羈聳
寂然反聽杳難詰但覺萬竅俱玲瓏千金不得和偏力
誰謂起廢由枯桐曲終玄旨竟誰會非絃非指仍非空
拂衣欲往君且止為我乘興彈悲風

張仲山枝巢

達人孤高與世踈百年直寄猶須臾歸來掩關聊自如
人之不足等有餘樂哉下視濠梁魚逍遙自契莊蒙書
異時馭氣游太虛我知枝巢亦蘧廬

柳塘

摇摇風影漾寒塘靜裏亭臺日月長不似隋家堤岸上
亂鴉殘照管興亡

蘇門花塢

繞舍雲山慰眼新看花差後洛陽塵從君小築繁香塢
不負長腰玉粒春

閏月九日

南崖烘暖貯秋光勝處相公嚼一觴俚諺難逢兩寒食
閏餘今值小重陽頭風比似常年愈菊面渾如去歲黃
老矣歡遊定能幾佳時此樂最難忘

趙內翰據

據字子充宛平人自號醉全老人

早赴北宮

蒼龍雙闕鬱層雲湖水鱗鱗柳色新絕似江行看清曉
不知身是越朝人

趙文學承元

承元字善長先世汴人兵火間遇旅河間遂占籍馬大
定十三年詞賦第一人除應奉翰林文字兼曹王府文
學以疎俊少檢得罪王府貶廢久之遇赦量叙卒於臨
洮

探春

冰底流泉匹練飛翹塵着柳不禁吹杖藜恰到春生處
已有人家插酒旗

張太保行簡

行簡字敬甫大定十九年詞賦第二人家世儒臣備於
禮文之學典貢舉三十年門生徧天下南渡後遷禮部
尚書太子太保翰林學士承旨薨謚文正楊內翰之義
銘其墓稱敬甫天性孝友太夫人疾不解衣者數月居
喪哀毀過禮事其父御史大夫自幼至終未嘗少違顏
色與諸弟居三十餘年家門肅睦人無間言率勸子弟
不知爲驕侈雖處富貴與素士無異平生無泛交無私
謁慎勤周密動循禮法居無怠容口無俚言身無徑行
雖古君子無以加故天下言家法者唯張氏爲第一言
禮學言文章言德行之純備者亦唯張氏之歸有集三

十卷傳於家

敬甫賦燕云王氏烏衣巷盧家白玉堂庚
食云錫燕雞也留故事風花鶯柳開春成

中秋光露

桂宮此類甚多也

六月二十九日北宮朝回

疎柳衰荷又一時清波飛葉夢露芝年年踏盡溪邊路
不覺吳霜點鬢絲

酬郭光秀才

疇昔君來事已睽豈知今我又羈柙波臣儻不辭外斗
鳴外終當遇魯雞

題子端雪溪小隱圖

出處皆天豈自由仙標終合冠鰲頭不妨貌取黃華景
時向鈴齋作卧游

張內翰檄

檄字巨濟先世泰州長春人有官於山陰者遂占籍焉
曾祖頤宗銀青榮祿大夫祖惠懷遠大將軍父天白統
縣簿巨濟明昌五年詞賦第一人仕至鎮戍州刺史為
人有蘊藉善談論文賦詩筆截然有律度時人甚愛重
之陝州詩云駭浪奔生馬荒山卧病馳永寧劉氏園亭
云菊老芙蓉衰柰柿葉爭絳叩門人不應一犬吠深巷
此類甚多

秋興

飄零千里道牢落半生愁殘月如新月今秋似去秋露
濃花氣重風細竹聲幽何日清溪上煙蓑一釣舟

客中

絳脣花不語青眼柳初眠塵去尋芳馬香來載酒船歸
期仍鴈後野興已鷗邊惆悵無家客春風又一年

蓮實

水妃擎出紺珠囊玉笋彫槃喜乍嘗膏白已攙新藕嫩
心青猶帶小荷香闔餘翠鳥零珎羽飛盡黃蜂露窠房
口腹累人良可笑此身便欲老江鄉

初夏

小園綠筍間朱櫻點綴年華似有情露浥葛巾長氣潤
風隨竹簟晚涼生閑窺點鼠潛身處靜厭飛蚊遶躡聲
安得冷泉幽石畔解衣盤礴樹陰清

閻治中長言

長言字子秀濟南長清人客居兗州之滋陽祖俊行臺
南榜父時昇任忠傑榜曾高以來登科者六世矣子秀
少日慕張忠定之爲人故名詠避衛紹王諱改焉幼孤
養於從祖能自振厲好學工詞賦間有前人句法性本
豪俊使酒任氣及游京師乃更折節遂以謹厚見稱酒
酣耳熱故態稍出嘗以第一流自負屏山獨深知之不
以爲過也平生多奇夢果魁天下士論厭服在翰苑十
年出爲河南府治中被召以道梗不得前卒於亳州子
魯瞻魯安今一孫在洺州

北齊行

天保大人襲世貴未待齊成已無魏識裏方傳近水羊
夢中先兆攻城蜩六君三世都能幾二十八年翻手裏
細思孝靜靈運詩天道好還非忘矣

應制中秋

壁月當秋夜未闌漢宮高會浹宸歡塊蘇塵世三千界
珠翠瑤光十二欄桂實飄香浮壽斝露華零潤溢仙槃
都人側聽雲韶奏共指天家是廣寒

婆速道中書事

此地先經戰人生苦未聊泉源疏地脉田隴上山膏敗
石平危徑枯柴補短橋曉煙明遠爨暮雪暗歸樵履滑
心煩悸梯危骨欲銷解鞍空倒卧無夢訖通宵

送麗酒麗橙與秀實御史

驄馬朝回畫閣深遙知春意領梅心麗橙嬌軟麗尊小
聊助風流對淺斟

閻立本職貢圖

諤諤昌周此一書形容葵貢寫成圖寧知右相無深意
莫指丹青便厚誣

盤山招隱圖

畫出中盤望隱歸鳴珂朝馬尚遲遲賦詩未敢輕相誚
却恐吾山也勒移

三門集津圖

津門未爲天下險勿作駭相觀茲圖偃月堂中李林甫

有人能寫此心無

丁氏思祖亭

鶴野三千里鳧函五百年人間仍舊德龜筮得新阡族屬東州望衣冠臯祖傳吳時誰式墓應識子孫賢

李治中著

著字彥明真定人高才博學詩文得前人體工於字畫頗尚玄言承安二年經義第一人在翰林七年出副定州召爲戶部員外郎坐大中黨事謫臨洮府判官量移西京路按察司判官遷彰德府治中城再陷避于塔上兵人招降大罵不從掘塔倒而死

觀音院書閣

門巷蓬蒿一尺深小軒岑寂似山林鳥聲落枕有高下山色闕人無古今客裏三年侵老境床頭一易浣塵襟晚涼癡坐忘言裏滿地西風白玉簪

異人

擬栩先生王中立

中立字湯臣岢嵐人博學強記問無不知少日治易有聲場屋間家豪於財賓客日滿門所以待之者備極豐腴其自奉則日食淡湯餅一杯而已年四十喪妻遂不更娶亦不就舉選齋居一室枯淡如衲僧如是三四年乃出時人覺其談吐高闊詩筆字畫皆超絕若有物附之者問之不言也閑閑趙公知平定先生往謁之與之詩云寄語閑閑傲浪仙枉將詩酒污天全黃塵遞斷來

時路不到蓬山五百年因言唐世士大夫五百人皆仙人
謫降中有爲世味所著迷而不反者如公與我皆是也
一日來都下館於閑閑公家中秋夜飲酒賦詩且就公
索墨水一槃公如言與之明旦不告而去壁間留龜鶴
二字廣長一丈而墨水具在不知以何物書之也朝
士來觀者車馬填咽都下競傳王先生仙去矣久之先
生從外至問二字以何物書之不荅題詩其旁云天地
之間一古儒醒來不記醉中書旁人錯比神仙字只恐
神仙字不如先生平生詩甚多有醉袖舞嫌天地窄詩
情狂壓海山平之句他亦稱此人有問世外事者亦一
二言之好作壁窠大字往往瞑目爲之筆意縱放勢若

飛動閑閑公甚愛之屏山嘗見先生商略前代人物引
先儒論議數十條在目前如人人自相詰難然後以己
意斷之以爲辨博中第一流人也臨終預尅死期如言
而逝州將石倫葬之忻州時年五十六予嘗從先生學
問作詩究竟當如何先生舉秦少游春雨詩云有情芍
藥含春淚無力薔薇臥晚枝此詩非不工若以退之芭
蕉葉大袍子肥之句校之則春雨爲婦人語矣破却工
夫何至學婦人先生晚年易名雲鶴自號擬桐云

中秋

素丸東溟來飛上玻璃盆聊揮五輪手撥去萬里陰印
透山河影照開天地心人世有昏曉我未嘗古今辨傳

作素純青溟來
聊舒五輪指

雜詩四首

華山宮殿白雲封不見當年打睡翁
貪看終南山色好不知紅日下前峯

獨跨蒼虬下太清春風萬里月華明
因君感激為君說鑿破天機我也驚

雲葉粼粼皺碧空笙簫遙響入天風
忽驚風浪耳邊急不覺形神來世中

此生休更問浮名名利區區不甞停
我有一丸天上藥用時還解濟蒼生

題裕之樂府後

常恨小山無後身元郎樂府更清新
紅裙婢子那能曉送與凌煙閣上人

王先生予可

予可字南雲吉州人父本軍校南雲亦嘗隸籍年三十許大病後忽發狂久之能把筆作詩文及說世外恍惚事南渡後居上蔡遂平鄆城之間在鄆城為最又遇文士則稱大成將軍於佛前則諦摩龍什於道則騶天玄俊於貴游則威錦堂主人為人軀幹雄偉兒亦奇古戴青葛巾項後垂雙帶狀若牛耳一金鑊環在頂額之間兩頰以青涅之指為翠靨衣長不能掩脛故時人有哨腿王之目落魄嗜酒每入城市人爭以酒食遺之夜宿

土室中夏月或尸穢在旁蛆虫狼藉不卹也人與之希
落希數百言或詩或文散漫碎雜無句讀無首尾多六
經中語及韻學家古文奇字字或峭勁遇宋諱亦時避
之人或問以故事其應如響諸所引書皆世所未見談
說之際稍若有條貫則又以誕幻語亂之麻知幾張伯
玉與之游最狎說其所詩以百分為率可曉者才二三
耳題崧山石淙云石裂雲華清月秋蓋石淙之石皆狀
若湖玉其高有五六十尺者石之文如魚蝕木如太古
篆籀奇峭秀潤一一在潭水中親到其處知詩為工也
蔡州北懸壺觀仙掄云壺樹苔波月清皴醉後云一壺
天地醒眠小宮體云萬疊雲山飛小鴈射虎首句云風

色偃貂裘即閣筆自戲云此虎來矣樂府云唾米絨舌
淡紅甜又自戲云欲下犁舌獄耶和太伯宮詞云金盆
水不暖翠雀啄晴苔又云鳳蹴瑤華散龍銜桂子香西
瓜云一片冷截潭底月六變斜卷隴頭雲烹茶云簾捲
綠陰花外月玉山冰雪醉扶翁凌霄花云啼鳥倒銜金
羽舞驚蛇斜傍玉簾飛威錦堂樂府云鳳環捧席帶香
屏鯨杯倚伎和雲捲解懸此類尚多人亦多贈南雲詩
者李子遷云石鼎夜聯詩筆健布囊春醉酒錢鹿真南
雲傳神詩也壬辰兵亂為順天軍將領所得知其名竊
議欲挈之北歸館於州之瑞雲觀南雲明日見將領自
言云我不能住君家瑞雲觀也不數日病卒後復有見

之淮上者

宮詞

水曲朱門漪漾漫一簾花雨月波寒金闈背觀鴛鴦冷
春困秋千立畫干

南園湖石

翠雀銜雲墮翠蕪砥峰倒影卧平湖飛花不到穿簾月

高倚晴天一劍孤

馴鶴圖

張鶴王冢畫慎宮人徐行以手整釵
一鶴後隨謂之馴河圖伯玉請賦詩

釵收常苦其作詩多不
用韻限以釵來苦三字

寢處粧鈿未捲釵孤雲花帶月邊來六宮簾幕金鸞冷
露濕晨煙啄翠苔

雜詩二首

白露沙灘浸綠湄小舟艤岸尚依希山回屏曲江連樹
春鎖人家深處歸

暗悲秋色素團團一雨飄零颺霽寒天淨長空煙斂處
彩虹金挂樹頭山

宮體二首

紅葉鋪霜撼御階繡蓮塵蹴襯羅鞋袖沾鸞翹調簧語
墮却銜翹入鬢釵

驕馬金籠藉草歸翠鸞屏曲染紅霏凭攔山色春風裏
喚得鸞兒燕子飛

照了居士王或

或字子文洛州人承安中進士資剛決不可犯為尚書
省掾知管差除與郎官相可否即弃官去往來登封廬
氏山中改名知非字無咎自號照了居士居山中二十
年布衣蔬食井臼自親時人哀苦之而知非處之自若
也少日為文工於四六詩亦有功神二宋落花韻四首
忽驚遺夢到延涼聚塵非分侵凌玉流水無情葬送香
錦鞵漫隨終隔面絲灰雖吐若為腸蒼苔碧草無窮恨
木石癖兒亦自傷可人未敢出鄰壑回首空殘翠幕涼
好事只傳懷夢草殊鄉誰致返魂香塵疑燕子慵開眼
煙影馬空只自傷賞心死着未能忘瓊技不解留春色
綠燭青帝回車日合有祥風老退房韶華終竟合彫傷
情知青帝回車日合有祥風老退房韶華終竟合彫傷
獻笑瑩懷忍遠忘露壓不禁昏淡臉風披無柰醉愁粧
芳菲頓感林園趣狼藉空餘陌路香却憶班姬浪辛苦
一生都得既學佛作決定歌禪家以為證道新豐之後

無有及者初出京有詩云親踈俱穩人偷了婚嫁齊成
俗意周一筆盡鉤塵債斷都無虧欠大家休休休愛
著何時是徹頭風息浪平人已渡笑携明月下孤舟崧
山中云撒手寧論萬丈崖脚跟未肯點塵埃東君也自
魔君數故着青紅眼底來來何遲去何早二五不多十
不少一聲柄木徧虛空誰識堂堂真照了又贈安居士
國寶云不招措大喚不喚王子文不惹禪和笑不名王
照了他人怕人嫌照了要人嫌人人有面樹有皮努力
方便勤粧嚴粧嚴也由賢不然也由賢鼻孔莫遣他人
穿又荅國寶云幻人誰拙復誰能將戲何妨傀儡棚凡
事不堪君莫怪農家面目得人憎又云忽然識破虛空

我六合縱橫更有誰正大壬辰參知政事宗室思烈行
臺洛陽以知非有重名力致之使參議臺事城陷不知
所終子升卿有賦聲早卒

禪頌三首

昧已全拋大事憂為渠剛攬等閑愁棄揄晚景無多子
針芥人身豈易投

閑日搆來忙日用此生迷却再生休鼻頭挨轉從今始
看作回程火裏牛

吾身非我底為情說着塵勞特地驚為五九盡時山更好
澗泉雲鳥自春聲

放下情懷觸處安生涯取取沒多般褐衣襤褸聊遮赤

短髮鬪鬚底用冠一榻首緣資困歇二匙隨分了飢食

也知苦澁人人笑烈日初心不敢護南征未獲武官李獻

能申欽叔愛其才辭欲活之郎中劉光遠也乃託以問事

機報寸軍中許國只天知明朝定作長淮鬼馬革仍煩為

地報寸軍中許國只天知明朝定作長淮鬼馬革仍煩為

都尉又云金國歲歲南侵計所得不能一毛二州而軍力折

公始者不若此南軍大舉斂兵而退其後何出無功得全

師而返則猶公受禍不然師老食殫而固其堅成也下讓

見一城則責以不降之罪以一死見之謀進人知不果乃

都尉亦于名教有功書上之明日申見之謀進人知不果乃

皆附烈見于此語萬古橫鐘卓與王知非烈就戮甚嗟不政謾

無事道人董文甫

文甫字國華潞人承安中進士爲人淳質恬于世味於心學有所得人知尊敬之而不知其所以得也子安仁亦學道父子嘗閑居寶豐蘭戶不出以習靜爲業朝夕不繼晏如也國華歷金昌府判官禮部員外郎昌武軍節度副使正大中以公事至杞縣自知死期作書與家人及同官又作詩貽杞縣令佐詩畢擲筆于地以扇障面而逝有和太白山明和尚牧牛圖詩刻石於洛陽其引云夫人有等差教分頓漸上根之人一聞千悟不落階級中智而下必由漸進此人牛次第不得不立心性動靜微妙有無學者所宜諦觀也以人牧牛是動而有制從有以觀其微者也進進而不已則漸至於回首馴

伏從無以觀其妙者也有入于無微及于妙固善矣又不知靜而無礙之爲愈也靜而無礙又不知兩忘雙泯之入神也若夫人牛兩忘明月獨照恍然俱失所在當是時也吾將離形去智神亦無功同于大通與道爲一則向之人牛亦筌蹄中一微塵耳吾儒所謂盡心盡性者無外於是因借明和尚韻再下一轉語會心者必能知之詩不錄

秋夜

見即如無爐上雪淡而有味水中拾盃齋行定惠千燈炳
淨識乾坤一鏡奩

晝眠

莊周先我復天真化蝶飛來管領春我亦莊周同亦蝶
不知若箇是真身

審是堂

按劍人人駭夜光蜀鷄合道勝鸞鳳飛蛾可是無分別
直道油燈是太陽

文中子續經

紛紛述作史才雄聽似秋來百草蟲不是春雷轟蟄窟
到蛇會得化成龍予嘗以王氏六經為問先生云王氏
六經是推道設教雖孔子亦然但後
人以雌詩見示

臨終詩四首

無情喪主沒錢僧送上城南無事人檢盡傳燈無盡錄

更無公案遶番新

生有地死有處萬牛不能移一步一輪明月印天心此
是渠儂住處住

白髮三千丈紅塵六十年只今無見在虛費草鞋錢
今古一輪月分明印碧霄門門蟾影到處處桂香颺不
起眼中暈何勞指上標真空渾照破歸去杖頭挑

隱德 薛繼先

繼先字曼卿荷氏人少日三赴廷試南渡後隱居洛西
山中課童子學事母孝與人交謙遜和雅所居人化之
子純孝字方叔有父風客有詐為曼卿書就方叔取物
者曼卿年已老狀兒如少壯人客不知其為曼卿而以

爲方叔也而與之書曼卿如書所取物付之雖其家人亦不以與之也監察御史石玠子堅行部過曼卿曼卿避不之見或言君何無鄉曲情耶曼卿曰君未之思耳凡今時政未必皆善石御史一有所劾則必謂自我發之同惡相庇他日并鄰里有受禍者其畏慎類此正大末司農卿楊慥叔玉丞康錫伯祿薦曼卿與汴人高仲振武陟宋可武清張潛磁陽曹珏大名王汝梅隱操不減古人朝廷議授以官以兵亂不果曼卿喜作詩工于賦物如松化石云瘦見千年傲霜骨鍊成一片補天心時人稱焉壬辰之亂病沒於宜陽仲振字正之系出遼東其兄領開封鎮兵正之幼就舉選年四十後即以家

業付其兄挈妻子居嵩山於書無不讀而以易皇極書爲業安貧樂道不入城市山野小人亦知敬之王汝梅張潛從之學三人行山谷間人望正之風袖翩然如欲仙而未舉也張王說正之嘗遇異人教之養生呼吸吐納日以爲常靈氣時至安坐不動而骨節戛戛有聲恍惚中時與真靈接對所談皆世外事既不以語人故無得而傳潛字仲升有志節慕荆軻聶政之爲人三十歲後乃折節讀書太學諸人高其行義有張古人之目客崧山從正之學易五十歲始娶妻妻魯山孫氏亦有賢行夫婦相敬如賓負薪拾穗行歌自得大用與之同業而生理優贍怡高張之貧時有餽餉皆謝不受鄉里爲

仲升斲瓜田瓜熟仲升約中分之以償其勤衆不忍但小摘而去仲升亦弃瓜不收衆如約然後取食之嘗行道中拾得一斧夫婦計度移時乃持歸就訪其主歸之所居寺庄有兄弟分財致諍者其弟指仲升所居曰我家如此獨不畏張先生笑人耶天興之兵避於少室絕頂時世已亂寇效暴橫無復人理仲升不甘與之處閉口不食七日而死婦隨亦投絕澗中汝梅字大用律學出身伊陽簿秩滿遂不出性嗜讀書動有禮法生徒以法理就學者兼以經學授之後生輩服其教無敢爲非義者可守予之貞祐之兵其姑嫁大姓崇氏夫與子皆兵死而貲產獨在姑以白金五十笏遺予之予之受不

辭一日姑得橐之踈屬立爲後挈之省外家予之置酒會鄉鄰且謂姑言姑往時遺可以金可以橐氏無子故受之姑今有子矣此金橐氏物非姑物也我何名取之因呼妻子昇金出歸之橐氏鄉里用是重之大兵再駐山陽軍中有聞予之名者問知所在質其子使人招之曰肯從我者禍福與公共之不然公之子死矣親舊競勸之徃予之不從曰吾有子無子與吾兒之死與生皆有命焉豈以一子故併平生所守者而亡之乎其後予之竟以無子死珏字子玉早歲有賦聲誠實樂易世俗機穢事皆所不知喜賓客款於接物無書生氣習從之游者樂之而不厭也六人者喪亂後惟子玉居弘州

十二年乃終

九日感懷

曼卿

衰年易感我今知無訝騷人動楚悲故國又拋兵劫後
佳辰多負菊花期一時蘭艾同凋落兩鬢雪霜仍別離
高世輸他陶靖節悠然高與滄東籬

過洛陽

予之

西來東去洛陽城千尺浮圖了送迎十日酒旗歌板地
白頭孤客可伶生

寄人宰縣

仲升

縣務無難易人才自異同割雞良暫屈製錦要專工積
弊姦賊後遺黎喘汗中不存憂世志底用讀書功嫉惡

看平日知君有古風莫教循吏傳獨載魯山公載方言作上聲呼

白髮感懷

子玉

少年豪舉氣如虹今日蕭然一病翁曉鏡祇添頭上雪
春風不綠鬢邊蓬文章那作一錢直燈火空勞半世功
擬築糟丘便歸老醉鄉何者是窮通

中州壬集卷終

